

Ils arguments dal comité da referendum

NA al sforz da biometria per passaports svizzers e per cartas d'identitad svizras

Il cussegl federal giustifitgescha il nov passaport cun la cunvegna da Schengen. **Ma là na vegni ditg cun betg in pled che las datas stoppian vegnir segiradas en ina banca da datas centrala. E là na vegni er betg ditg che la carta d'identitad stoppia vegnir emessa cun datas biometricas.** La Germania è sa decidida definitivamain cunter ina banca da datas centrala. En Germania po dal rest mintgina e mintgin decider, sch'ella u sch'el vul ina carta d'identitad cun u senza improntas biometricas. A las burgaisas ed als burgais svizzers percenter duain ussa vegnir sforzads si documents d'identitad biometrics. Expertas ed experts rendan attent a las mancanzas da segirezza gravantas da la tecnologia da RFID. Protecturas e protecturs da datas èn preoccupads.

Quest conclus federal chaschuna:

- custs supplementars per tut las burgaisas e per tut ils burgais (il passaport daventa pli char)
- custs supplementars per il viadi als centers da registraziun, pertge ch'il passaport e la carta d'identitad na pon betg pli vegnir dumandads en l'atgna vischnanca da domicil
- ristgas da segirezza, perquai che las datas vegnan segiradas en in lieu central
- cumpetenzas federalas nunnecessarias tras las datas biometricas da las burgaisas e dals burgais
- intschertezzas davart la dumonda, cura e nua che las datas dal chip da RFID vegnan clamadas giu sco er nua che questas datas restan e vegnan utilizadas
- che la Svizra è in dals sulets pajais sin l'entir mund che sforza sias burgaisas e ses burgais da laschar registrar lur datas biometricas en ina banca da datas centrala
- in'extensiun dal stadi da surveglianza

En cas d'in NA n'è la cunvegna da Schengen BETG periclitada directamain.

Il conclus federal va bler pli lunsch che las pretendiuns da Schengen.

En cas d'in NA n'è la libertad da viagiari BETG periclitada. Gnanc per entrar en ils Stadis unids vegni pretendì in passaport biometric. Per viagiari en ils Stadis unids senza passaport biometric dovran ins – sco per viagiari en blers auters pajais – simplamain in visum. Per dimoras da passa 90 dis en ils Stadis unids dovran ins dal rest in visum, er sch'ins ha in passaport biometric.

Nus pretendain che mintga burgaisa e che mintga burgais possa decider er vinavant, sch'ella u sch'el vul in passaport biometric u in passaport convenziunal.

I n'è betg necessari d'introducì ina carta d'identitad biometrica e da segirar las datas en ina banca da datas centrala. Ni Schengen ni ils Stadis unids pretendan quai da la Svizra.

Ulteriuras infurmaziuns sut www.freiheitskampagne.ch